

Gvangjsih Minzcuz Bau

ganhhau: CN45-0036 B.2019 Nd.5 Ng.15 liggaueq geijhailh nienz ndwenseiq cib'it

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3374期

Gvangjsih Veisi Boqcuengq Aen Lanzmoeg Loih Vwnzva Cauhnduj 《Minzcuz Vwnzva》

Aen densi lanzmoeg loih vwnzva cauhanduj 《Minzcuz Vwnzva》 youz aen donzdui Gvangjsih Veisi gag yenzfat guh haenx ndwen 5 ngoenz 5 hainduj cingqsiq boqcuengq. Aen cezmuq dingh moix ngoenzsinghiz 21:40 youq Gvangjsih Veisi boq baez nduj. Aen cezmuq neix muzdiz dwg angjcuengq dujva minzcuz, fwen minzcuz, langhbaiz gij gyaue minzcuz, cau hoenz minzcuz, doenggvaq gij soujduenh densiva, gojgaeqvaq, engq cienzmienh, engq haeujlaeg, engq mizyinx langhbaiz, cienzboq, cienzdoh, fatyienz gij vwnzva maenhndei Cunghvaz Minzcuz, senhconz gij vwnzva cienzdoengj bonjdieg Gvangjsih, doxgyau hag' aeu gij vwnzva maenhndei seiggyaiq.

《Minzcuz Vwnzva》 dingjmaenh gij cauhtuh yinxyienq yungh lwgminz guh gyangsim, cawjgiek daj gihcwnz daeuj, dwg bouxvunz roxnaeuz gyoengq vunz gyaepgouz loqsiengj fatyienz swnjcienz minzcuz vwnzva haenx. Gyoengqde yungh gij cingz saedsoh, guhbaenz gij yaem'wenq hawj vunz

gamjdoengh, yungh gij yiengh yisuz lwnhgangj lwgminz gak cuz ndiepgyaez ndwenngoenz, ndiepgyaez mbanjranz, gagsaenq vwnzva, saenq seizdaih.

《Minzcuz Vwnzva》 yaek geiqboq 12 geiz, moix geiz cezmuq 30 faen cung youq ngoenzsinghiz banhaemh Gvangjsih Veisi boqok, cib ciz doekgonq yungh gij soujap geiqsaed lwnhgangj gij gojgaeq bouxvunz guhdaeuz haenx, song ciz doeklaeng senj gij cezmuq ndei ndawde bae funghranz yienjboq comzyienj vwnzyi. Geiq daih'it geiz nduj boq Aen Duenz Habciengq Vunzvet, aen duenz habciengq "gwnz muengx okmingz" bonjdieg Gvangjsih neix. Aen duenz habciengq yisuz hamj gyaiq neix youz bouxgyaez ciengqgo gak hangz gak gyaiq gapbaenz, aenvih cauhtuq yienjciengq 《Gingjangj Meuzndaem》, ndaej 《Yinzminz Yizbau》 diemj mingz haenh, sibinz gwnz muengx cungsoq yawjgonz cungbyoengq 2000 fanh, aenvih neix ndaej okmingz. Ndaw cezmuq, cujdaujyenj

gvancez gij leixniemh meizdij doxgap, cingj boux cawjboq cezmuq ciengqgo dendaiz dangguh bouxrabau minzcuz vwnzva, damqcuenz Aen Duenz Habciengq Vunzvet, doenggvaq dendaiz cazyawj, giethab gij soujduenh biudap densiva gojgaeqsingq, caeuq donzyenz itheij baizlien, hag gij cingz minzcuz biudap vwnzva bonjdieg, haenh gij siengjmuengh ndaw ndwenngoenz nyaengqnyat, haenqrenz yungh habciengq yienj gij gojgaeq minzcuz vwnzva seizdaih moq caeuq ndwenngoenz gyaundeit.

Ciuq cam rox, 《Minzcuz Vwnzva》 lij yaek doenggvaq aen bingzdaiz yungzmeizdij, yungh gij hingzsiq bouxcoz maij dingq gyaenz yawj haenx, youq veihboz, veihsin, diuzdaeuz ngoenzneix daengj gwnz muengx fat, doengzseiz hix doenggvaq aen bingzdaiz meizdij moq gvangqlangh ra bouxswnjcienz caeuq bouxgyaez minzcuz vwnzva, senj bouxvunz ciq ndei de caeuqfaenh loegguh cezmuq.

(Bangz Gwzbingz)

SIUSIK DINJ

● Ndwen 5 ngoenz 10, Lingzyinz Yen Yinggizban daiqdaeuz cujeiz yen minzcwnz, yinzfangz, anghen, lijyouz, siuhfangz daengj bouhmonz guh aen hozdung senhconz fuengzcai gemjai, aen cawjdaeuz dwg "daezsang gij naengzlig fuengzceih caihaih, hwnjguh diuz fuengzsieng sengmingh ancienz", hozdung yinx ndaej haujlai vunz bae hmx yawj, soundaej gij senhconz yaugoj ndei.

(Du Meijhing)

● Mboengqneix, Lozcwnz Mulaujcu Swciyen banh aen hoihfwen dwkcawz bangvunz simnduk nem aen vanjvei yienjheiq gij hozdung ndwen senhconz minzcuz doxgiet. Vanjvei yienhciegz, diuqfoux, caijdiu, heiq daengj cezmuq doxlwnz hwnj daiz yienj, gangjok gij cingz vunzlai dangdieg ndiepgyaez guekcoj, doxgiet doxgyaez, cau'ok gij heiqfaenh naekna daengx biengz caeuqfaenh dwkcawz bangvunz simnduk.

(Luz Cuihyinz)

● Mboengqneix, Gungcinghdonz Nanzdanh Yen Veijyenzei caeuq Bouqdiemq Hung Ah' wjbeihshw bae daengz Bazhingh Yauzcuz Yangh caeuq Lijhu Yauzcuz Yangh cungh siujyoz, youwzyenz guh aen hozdung gien simndei "saedyienh aen loqsiengj iq bangrenz vut gungz gunggeng", hawj 135 boux hagseng ndaej saedyienh aen loqsiengj iq. Hozdung gungh giensoengq buek denz, buhvaq, haiz, saw ndeu, gyaqcienz dij fanh lai maenz.

(Hanz Gaihyin)

● Mboengqneix, Bahmaj Yauzcuz Swciyen Nazdauz Yangh Minzanh Cunh banh hawfwen "Gamjbwnz" dangdieg bi gvaq baez haenx. Hozdung yienhciegz, gyoengq canghfwen yungh Fwencuengh dangdieg daegbied haenx gangjok gij gietsim dwkcawz bangvunz simnduk caeuq muengh gvaq ndwenngoenz gyaundeit, hawj gyoengq vunz lai roxyiuj gij cienhangh dwkcawz bangvunz simnduk.

(Loz Beifanz)

Yungzsuij:

Mbanjmyauz Angq-hoh Ciet Daxmeh

Ndwen 5 ngoenz 11, Yungzsuij Myauzcuz Swciyen Mbanjmyauz vuh Mbanjmyauz banh aen hozdung ciepcoux ciet daxmeh, geij bak boux mehmbwk Ranzmyauz ndang daenj buhvaq moqsag, youq mwh boq venz, caij din venz caeuq langhbaiz ndangdaenj daengj hozdung angqyangz ciepcoux ciet daxmeh daeujdaengz. Ndaw doz dwg gyoengq mehmbwk cingq diuq fouxsauz.

(Lungz Linzci/龙林智)



Majsanh Yen Vwnzva Lijyouz Yungzhab Bangrenz Lajmbanj Ndae Leih

Geij bi neix daeuj, Majsanh Yen Bwzsan Cin dawz gij vwnzva gyonghoih Bouxcuengh caeuq lajmbanj lijyouz dox giethab, gyoengq vunzmbanj daj ndaw vwnzva lijyouz yungzhab neix ndaej hoengzleih saedsaed caihaih.

Ciuq cam rox, Bwzsan Cin Gyauzmeij Cunh dwg dieggoek gij vwnzva gyonghoih Bouxcuengh ndawde dieg ndeu, haujlai dieg Bwzsan Cin cungj miz gij cienzdoengj doxdax gyonghoih guh'angq, geij bi neix daeuj, Bwzsan Cin mboujduenh vatcimh gij vwnzva gyonghoih Bouxcuengh, laebdaeb ciengqgok gij binjbaiz lijyouz

gyonghoih Bouxcuengh miz minzcuz vwnzva daegsaek, haujlai bouxhek daeuj yawjgonz gyonghoih, caeuq vunz aen cin neix caemh guhcaemz guh'angq. Vih gaijgez gij vwndiz gyoengq bouxhek gwn ndoet caemz angq, aen cin neix laebdaeb yinx ngaenzcienz ndawbiengz douzcienz hwnjguh swnggaep "aen cin'iq byadah" Majluz Bengih, Gamjguenyaem Minzcuz, aen nungzcangh swnghdai bya heu raemx saw Dahraemxhoengz, diegsuen youq gwnz raemx guh'angq giujgizlungz daengj lijyouz hanghmoeg, saedyienh gij moegbiu hawj gyoengq bouxhek "daiq

maqmuengh daeuj, daiq habhoz dauq".

Ciuq cam rox, bi 2018 doxdaeuj, Bwzsan Cin gungh yinx ndaej 90 lai fanh bouxhek ndaw gih rog gih daeuj youzset, daiqdoengh couhnieb 1000 lai vunz, cau souhaeuj 700 lai fanh maenz. Aen cin neix yaek laebdaeb doicaenh vwnzva lijyouz yungzhab, doenggvaq yinx bouxhek daeuj Bwzsan Cin, hawj vunz dangdieg laisou, mboujduenh hawj vunz dangdieg ndaej leih'ik, bangrenz hwnjguh lajmbanj aen cin neix byaij hwnj mbaek lae moq.

(Liz Vwnzvaz)